

KERATAN AKHBAR

TARIKH : 3 SEPTEMBER 2021

AKHBAR : BERITA HARIAN

BKC jana limpahan ekonomi lebih tiga kali ganda



Dana RM3.1 bilion bantu tambah perbelanjaan pengguna ketika hadapi pandemik

Oleh Mahanum Abdul Aziz
mahanum_aziz@bh.com.my

Pembayaran Bantuan Khas COVID-19 (BKC) Fasa 1, membabitkan dana RM3.1 bilion, berpotensi memberi kesan penggandaan kepada ekonomi antara tiga hingga kali ganda susulan tambahan perbelanjaan pengguna terutama kumpulan berpendapatan rendah, demikian kata penganalisis.

Pembayaran BKC Fasa 1 itu akan dibuat secara berperingkat mulai 6 September 2021 bagi penerima B40 dan 9 September 2021 bagi penerima M40 yang bakal memanfaatkan 4.4 juta isi rumah, 1.1 juta warga emas bujang atau tiada pasangan dan 4.5 juta individu bujang.

Profesor Ekonomi Sunway University, Dr Yeah Kim Leng, berkata pembayaran bantuan tunai itu tepat pada masa dan kritikal untuk membantu isi rumah yang terkesan dengan situasi pandemik berpanjangan yang disusuli oleh pelaksanaan Perintah Kawalan Pergerakan Penuh (PKPP).

Beliau berkata, suntikan

RM3.1 bilion itu akan memberi rangsangan perbelanjaan kepada ekonomi, sementara kesan penggandaan memberi sokongan kepada pertumbuhan Keuaran Dalam Negara Kasar (KDNK) pada bulan terakhir suku ketiga dan berterusan ke suku keempat.

"Penggandaan penggunaan bagi kumpulan berpendapatan rendah yang rata-rata membelanjakan 80 peratus daripada pendapatan diterima adalah kira-kira lima kali ganda dalam jangka panjang.

"Dalam tempoh terdekat, suntikan RM3.1 bilion dijangka menyumbang kurang sedikit daripada 0.2 peratus kepada KDNK negara," katanya kepada BH mengenai impak pembayaran BKC Fasa 1 kepada ekonomi.

Mengulas lanjut, Yeah berkata, pemulihan ekonomi yang mapan adalah penting untuk kadar jangkitan harian COVID-19 berada di bawah kawalan supaya langkah membendung pandemik yang ketat boleh dilonggarkan dan pengguna rasa selamat serta

yakin untuk berbelanja membatik aktiviti di luar rumah.

Sementara itu, Ketua Ahli Ekonomi Bank Islam Malaysia Bhd, Dr Mohd Afzanizam Abdul Rashid, berkata pembayaran BKC itu seharusnya beri impak positif kepada ekonomi berikutan golongan B40 mempunyai kecenderungan tinggi untuk berbelanja.

Beliau berkata, memandangkan lebih separuh KDNK negara terdiri daripada perbelanjaan swasta, bantuan tunai langsung itu seharusnya dapat beri lonjakan kepada KDNK bagi September dan juga suku keempat 2021.

"Berdasarkan *marginal propensity to consume* (MPC) yang berada pada paras 0.71, ia akan menghasilkan jumlah tambahan perbelanjaan sekitar RM2.2 bilion," katanya.

Sementara itu, Ahli Ekonomi MIDF Research, Abdul Mui'zz Morhalim, berkata BKC Fasa 1 rangsangan ekonomi yang baik dan sokongan yang diperlukan khususnya golongan B40 dan M40

yang terkesan akibat COVID-19 masih berlanjutan.

Beliau berkata, program lain seperti Bantuan Prihatin Rakyat, moratorium bayaran balik serta pengeluaran i-Sinar dan i-Citra bagi pencarum Kumpulan Wang Simpanan Pekerja (KWSP) akan turut menyokong pertumbuhan perbelanjaan pengguna.

Pensyarah Ekonomi Universiti Utara Malaysia (UUM), Profesor Madya Dr Irwan Shah Zainal Abidin pula berpandangan pembayaran BKC Fasa 1 itu adalah manifestasi awal kepada Kabinet yang menekankan budaya kerja berprestasi tinggi dan menunjukkan kerajaan peka terhadap keperluan semasa rakyat.

Beliau berkata, penyaluran bantuan tunai itu dijangkakan merangsang permintaan domestik negara dengan memacu sektor penggunaan swasta dan dapat menyegarkan sedikit sektor perniagaan, terutama perusahaan kecil dan sederhana (PKS) yang begitu terkesan ketika ini.

"Dari segi penggandaan ekonomi agak terhad, namun ia sedikit sebanyak memberikan kelegaan kepada penerima manfaat ini seperti mereka dalam kategori miskin tegar, B40, M40 dan golongan bujang yang berkelayakan.

"Kesan pengganda ini dapat dilihat, terutama pada akhir suku ketiga tahun ini dari segi peningkatan perbelanjaan boleh guna rakyat, penggunaan swasta dan beberapa sektor khusus seperti sektor perkhidmatan dan subsektor perkhidmatan, sektor makanan dan minuman, perdagangan borong dan runcit serta industri berasaskan makanan," katanya.

Bagi peserta industri peruncitan pula, Setiausaha Agung Peratuan Peruncit Bumiputera (BRO), Mohamed Mustakim Manaf, berkata peruntukan RM3.1 bilion itu secara langsung menyuntik aliran tunai ke dalam pasaran dan berharap akan berupaya merangsang sektor peruncitan.

Namun, katanya, jika bantuan tunai itu lebih bertumpu untuk B40 dan M40 melangkaikan pinjaman kad kredit, kereta atau rumah, maka impak kepada sektor peruncitan adalah terhad.

"Kita berterima kasih kepada kerajaan di bawah pimpinan Perdana Menteri, Datuk Seri Ismail Sabri Yaakob yang pantas memberi kelulusan untuk segera mengagihkan bantuan ini demi kebaikan warga B40 dan M40. Apa juga suntikan tunai ke dalam pasaran tetap dijangka membantu sektor peruncitan," katanya.

“Kesan penggandaan beri sokongan kepada pertumbuhan KDNK pada bulan terakhir suku ketiga dan berterusan ke suku keempat”

Yeah Kim Leng,
Profesor Ekonomi Sunway University



“BKC Fasa 1 adalah rangsangan ekonomi yang baik dan sokongan yang diperlukan khususnya golongan B40 dan M40 yang terkesan akibat COVID-19 masih berlanjutan”

Abdul Mui'zz Morhalim,
Ahli Ekonomi MIDF Research

